

09. februar 2016

UPA 2016/73

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Kalaallit Nunaanni Inatsisartunut qinersisarneq pillugu Inatsisartut inatsisaata¹ allanngortinneqarnissaa pillugu Naalakkersuisut UPA 2017-imut suliniuteqaqqullugit Inatsisartut aalajangiiffigisassaattut siunnersuut. Taamaaliornikkut inatsisartunut qinersinissaq tulleg nallertinnagu Avanersuup, Ittoqqortoormiit-llu immikkut inatsisartunut qinersiveqalernissaat qulakkeersinnaaqqullugu.

(Inatsisartunut ilaasortaq Anthon Frederiksen, Partii Naleraq).

Tungavilersuut:

Naluneqanngitsutut inatsisartunut qinersisarneq pillugu inatsit 1998-imi allanngortinneqarmat, nunatsinni qinersivik ataasiinnanngortinneqarpoq. Kisianni taamanikkulli Avanersuarmit aamma Ittoqqortoormiit inatsisartuni sinniissuutitaqarniarnerat ajornartorujussuanngorpoq.

Tamatuma kinguneraa, sumiiffiit taakku nunatsinni avinngarussimaqisut aammalu ilaatigut sinerissap sinneranut sanilliullugit, inuussutissarsiornikkut allarpassuartigullu immikkuullarissunik atugassaqartitaasut inatsisartunut toqqaannartumik pissutsinik immikkuullarissunik oqariartuuteqarsinnaajunnaarnerat.

Namminersoneq pillugu kommissionip isumaliutissiissutaani 2003-imeersumi ilaatigut ima allaqqasoqarpoq:

¹ Inatsisartut inatsisaat nr. 9 31. oktober 1996-imeersoq allanngortinneqarsimasoq Inatsisartut inatsisaat nr. 10 30. oktober 1998-imi kiisalu Inatsisartut inatsisaat nr. 21 3. December 2012-imi.

“Tamat oqartussaaqataanerat aallaavigalugu kissaatiginarpoq nunap immikkoortui sapinngisamik naalakkersuinikkut aallartitaqartinneqarnissaat. Innuttaasut avinngarusimasuniittut amerlannginnertik pissutigalugu qinigaasinnaanerat nalaatsornerinnarmik pisinnaasarpoq. Soorunami illersoriarneqarsinnaavoq inatsisartunut ilaasortat nuna tamakkerlugu sullisissagaat; taamaattoq nunap isorartuujunera, najugaqariaatsit assigiinnginnerat aammalu angalaniarnermut aningaasartuutit qaffaseqisut ajornakusoortippaat inatsisartunut ilaasortap ataasiinnaap nuna tamakkerlugu sinnerlugu iliuseqarsinnaanermi.

Aammattaq qinersivinnik immikkoortortaqaqarnerup iluaqutigissavaa qinigaasup qaminut qinersisinut attaveqarsinnaanera. Taamaammatt ataatsimiititaliap tamanna aallaavigalugu pisariaqarsoraa qinersivinnik ammaaqqinnissap eqqarsaatigisariaqarnera”.

Taamaammallu aamma ataasiarata tusartarparput, Avannersuarmit, Ittoqqortoormiillu qangatut immikkut inatsisartunut qinersivinngortinneqarnissaat kissaatigineqartartoq.

Nunatsinni kikkut tamat oqartussaaqataanerat pingaartillugu tamatta oqariartuutigisarparput, taamaattumik nunarujussuatsinni angallannikkut, pilersuinikkullu aamma ilaatigut atugassarititaasut pitsaanerpaajungitsut ilanngullugit eqqarsaatigalugit, pisariaqarpoq Avannersuarmit, Ittoqqortoormiillu inatsisartuni malunnaateqarnerusumik sunniuteqarsinnaanerat anguniassallugu.

Sumiiffinni taakkunani pineqartuni, aamma inuussutissarsiornikkut pimoorullugu siuarsaasoqassappat, pisariaqarpoq inuit ulluinnarni pissutsinik qanimut malinnaasut aaliangiisartut akornanni peqataatinneqarnissaat.

Tassami naluneqanngilaq sumiiffiit taakku aamma eqqarsaatigalugit, suli inuussutissarsiornikkut allarpassuartigullu piorsaanissaq pisariaqartoq.

Neriuppunga siunnersuut ilalernerqarluarumaartoq.

Allaffissornikkut aningaasaqarnikkullu kingunerisassai:

Qinersiviit amerlassusaasa allanngortinnerisigut naatsorsuutigineqanngilaq malunnaatilimmik pisortatigut aningaasaqarnikkut allaffissornikkullu kinguneqassasoq.

Siunnersuutip piviusunngortinnissaanut inatsisissamik siunnersuummik ilusilersuinissamut suliaqarnissaq pisariaqartinneqassaaq. Allaffissornikkut suliaqartussanut suliamik immikkut

suliaqarumaartussanut (nutserinerit, tusarniaanerit kiisalu inatsisilerinermi teknikkikkut misissuineq ilanngullugit) aningaasartuutaasussat naatsorsuutigineqarpoq ukiup affaanut aningaasarsiassat qaangerneqassanngittut.